

MAJLIS RAMAH MESRA PENUTUP TIRAI MINGGU SUAIKENAL SEMESTER PERTAMA SIDANG AKADEMIK 2008/2009 PENGAMBILAN PERTAMA

Oleh : Mohd Hafizi Zalmi & Sayang Nursyahzleen bt Ramlan

Minggu Suaikenal Semester Pertama Sidang Akademik 2008/2009 Pengambilan Pertama ditutup tirainya dengan Majlis Ramah Mesra meraikan 1482 orang pelajar baru pada malam 2 Julai 2008 di Dewan 2020, Kangar. Majlis berlangsung dengan begitu meriah dan diserikan dengan kehadiran Naib Canselor UniMAP, Y.Bhg. Brigedier Jeneral Dato' Profesor Dr. Kamarudin Hussin bersama isteri, Datin Noridah Yangman, Pegawai-pegawai Utama, Ketua-ketua Jabatan dan staf-staf Jabatan Hal Ehwal Pelajar & Alumni (JHEPA), Universiti Malaysia Perlis (UniMAP).

Persembahan pembukaan tirai pada malam itu dimulai dengan 'overture' tarian dari artis budaya Unit Kebudayaan & Rekreasi (UKR) dengan iringan lagu Udara Kasih. Malam itu diteruskan lagi dengan simbolik gimik perasmian Majlis Ramah Mesra disusuli persembahan multimedia menayangkan sorotan aktiviti-aktiviti dan wajah-wajah pelajar baru sepanjang orientasi mereka yang menyentuh serta mencuit hati.



Persembahan yang dinanti-nantikan semua pula dimulakan dengan bakat pertama pelajar baru pada malam itu iaitu persembahan 'live band' dengan lagu Aku Cinta Aku Rindu dendangan dari salah seorang pemain 'keyboard' dan Sampaikanlah Salam oleh Saudara Rajkumar A/L Kaderasan disusuli dengan nyanyian solo lagu Inggeris My Heart Will Go oleh Saudari Siti Noor Asyikin Bt. Jamaluddin mendapat tepukan gemuruh dari para penonton. Seluruh ahli Pembantu Pelajar Minggu Suaikenal (PPMS) juga tidak kurang hebatnya dengan persembahan nyanyian mereka lagu Warisan. Majlis pada malam itu diteruskan lagi dengan deklamasi puisi oleh pelajar baru yang amat berbakat iaitu

Saudari Afaf Bt. U-Udeeb Mahfouz Jazouly hasil nukilan beliau sendiri. Sekali lagi artis budaya UKR menghangatkan persembahan malam itu dengan gelesan tarian Arab mereka. Seterusnya sekali lagi staf UKR tidak ketinggalan menyampaikan dua buah lagu yang sedang popular Hanya Kau Yang Mampu oleh En. Azuan Othman dan lagu rancak Teman Tapi Mesra oleh Cik Syamsyuhaida Sabri.

Persembahan dari bakat-bakat baru seterusnya sketsa yang mencuit hati penonton gabungan sekumpulan pelajar baru terselit mesej pengajaran tersendiri dan bermakna. Persembahan Boria yang bersahaja dengan liuk-lentok juga berjaya menghiburkan para penonton dengan bait-bait lirik yang menarik berkisar alam kampus UniMAP di Perlis. Persembahan dimeriahkan lagi dengan nyanyian 'bandboys' terdiri daripada lima pelajar baru lelaki dengan lagu Kenapa Singgah Kalau Tak Masuk. Majlis Perwakilan Pelajar (MPP) juga tidak melepaskan peluang mengadakan persembahan unik mereka terdiri dari gerak tari moden iringan lagu-lagu medley Melayu, Cina, India dan Thai pada malam itu.

Persembahan khas yang sungguh bertenaga daripada Y.Bhg. Dato' Naib Canselor pada malam itu diserikan dengan nyanyian lagu Keindahan Pantai dengan iringan poco-poco staf dan seterusnya nyanyian lagu duet bersama Datin Noridah, Burung Kenari.

Acara yang ditunggu-tunggu malam itu merupakan pengumuman anugerah King & Queen Of The Nite yang dimenangi oleh Saudara Ahmad Naim b. Buran (ahli band) dan Saudari Fattra Athierah bt. W.R Jamarulan (ahli Boria). Persembahan malam itu diakhiri dengan sebuah pentomin bertemakan anti dadah dari staf-staf UKR yang sungguh dramatik. Kostum, props serta berlatarbelakangkan set pentas yang kelihatan 'hidup' berjaya meninggalkan kesan mendalam kepada yang hadir. Himpunan lagu-lagu mengiringi setiap rentak tari juga merupakan salah satu faktor mengapa pentomin itu harus dipersembahkan lagi di masa akan datang terutama kepada golongan muda. Penghayatan mendalam serta mesej yang ingin disampaikan juga jelas dan berupaya bermain emosi setiap penonton yang hadir pada malam itu.

Keseluruhan Majlis Ramah Mesra ini amat meriah sekali. Namun diharapkan majlis seumpama ini akan datang bakal menjanjikan sesuatu yang lebih kreatif, berbeza, unik namun bermanfaat buat semua.

